

四庫全書

集部

欽定四庫全書

南軒集卷三十九

宋 張栻 撰

墓銘

夔州路提點刑獄張君墓誌銘

君諱枕字仲山於予為從兄寔同高祖予家自唐嶺南
節度使由曲江徙長安國子祭酒由長安徙成都再世
高祖諱文矩早捐館舍夫人楊氏挈孤依外家于漢之
縣竹今縣竹之張皆自高祖出也君曾祖諱絢祖諱鈞

考諱注俱隱德不仕考以君升朝恩封承事郎致仕累
贈正奉大夫君未冠遊鄉校貢京師入太學為內舍生
預國子薦靖康之難間關歸故鄉就類省試登紹興二
年進士科已而丁內艱免喪遊東南值先丞相忠獻公
督師江上辟君主管機密文字以軍事入對改承奉郎
湖寇平用幕府功遷宣教郎以親老丐歸授潼川府路
轉運司主管文字秩滿成都府路制置使席公益辟幹
辦公事未數月丁正奉公憂服闋通判參州又通判夔

州未赴權四川總領所撥發舩運至夔才兩月以臺檄
權知忠州還夔秩滿通判峽州丁所生母太碩人憂差
知資州未及赴服闋知榮州改知蜀州秩滿入對知隆
州中道改洋州歲中除利州路提點刑獄公事又徙夔
州路再歲請祠有旨令入奏行次荆渚得請主管台州
崇道觀即日西還以疾没于巴東享年七十有四積官
至朝請大夫君資稟淳茂於勢利泊如也方忠獻公督
師君在幕府入對論為國當先自治當上意忠獻且器

之而君顧以親老力引歸已而忠獻去國為時相所忌
併與族人抑之君以資考連得倅貳率遠次且愈下不
屑也其自蜀州入對上即位之三年方留意牧守訪問
再四貴近有欲見之者迄不往授小州而歸晚被召命
而祠請已再三上矣平時官情大畧如此其為政大體
本於忠厚愛民不苟其職而不為赫赫名利之為州三
面阻澗懸絕數十仞自北山引水入城承以木溜雜泥
滓牛馬飲民以為病君至始以陶易之甃三井以渚之

為宇以覆之題其額曰惠民至今賴其利是時提舉司
欲以它郡置場買茶君謂郡並邊每歲以茶之晚生者
易蠻馬今為場使夷人知茶味必得此而後市則將何
辭論再三議卒詘其攝事總幕益昌大水軍儲並江不
沒纔數尺君身當其衝督役夫日夜築治廩以完迺請
徙置高原今南倉是也其在忠州之歲又會大水入郭
郭君先期令民徙雖州治亦以舍計口予食親撫存之
民賴以活忠素彫弊獨以鹽課裨歲用君會一歲用度

出入以其餘代下戶輸上供銀數千兩人尤德之其在
蜀州州素苦重額累政積負緡錢總賦者方務聚歛督
趣急如星火君視民力困不忍剥取寧以身受責總賦
者遣其屬至郡鈎考微隱首校公帑籍迄無一毫私獨
劾君首議抗拒為諸郡倡朝廷察見始末使寬期限以
補總賦者迄無如之何郡有大辟獄具而君獨疑其賊
未得一夕夢至何處若神祠者有大書疑字驚而作曰
必是獄也審究之果主家紿囚以不死使之承追逮遂

服蓋其惻怛之誠雖夢寐不忘也時北邊方用兵總賦者議調西州民轉餉君謂有三不可西州賦重於三路不待調夫民力已疲矣自蜀至利役夫徒手走千里始得負糧而行又千里乃至西和古人以為千里饋糧士有飢色今且倍矣獨奈何且劔利調夫一人之費為錢八萬西州道遠費必倍以一夫十六萬錢計之直米五十碩古人以三十鍾致一碩為困民今以五十碩致六斗之粟利害又相絕矣卒寢其議一路賴之其在洋州

異時逋戶反業得貸牛出租於官合諸州累欠至三千餘碩總計者用為實數以給軍邊民至破產不能償君列其事于朝悉得免郡歲受民租總賦者輒對糴以給軍先時民輸一石以七合為羨其後並緣十倍之至是又欲以七升為額君曰作法於貪其弊將可窮邪力沮止之其持節利路興洋間多營田與民田錯官軍怙強為擾田且多荒君上其事于宣撫使請令民亦得佃耕農穀用以廣蜀饑流民至關外者甚衆按視振給且廣

糴以平穀價使皆得食知樞密院虞公允文時為宣撫使每咨訪以事君率正論一不及私再三為言成都路預借之弊朝廷非不申救而迄不能止蓋以諸郡例空乏無以塞責則巧為之計今不若盡攷其用度出入之實上聞而有以寬卹之則預借可戢民受實惠矣其後諸州卒得蠲減實君發其端其在夔路於獄事尤切切首下教禁戢四事拷掠無得過數繫治無事踰律訊問必躬臨疾病必以實合一路之獄凡六十有五禁囚百

三十事令下才閱月以獄空聞者三十八所變恭兩州
合欠經制緡錢至二萬七千有餘君謂赦令之下有所
蠲獨此不得邪言于朝併他路得免其不急於催科而
篤於厚民類如此亦異於俗吏所為矣君孝友恂恂幼
事正奉公甚謹中歲以來率婦子奉所生母曲盡其意
居喪以毀瘠聞治家有法度不事華飾不為戲言不忍
言人過鄉人尤親且敬之不敢干以私待族黨有恩視
其尤困乏者推居官所得俸以給之女兄及族弟之女

貧不能行君收撫嫁遣比君沒哭之如父少長從忠獻
公公每愛其慤實時時從旁推揚蜀之賢士大夫而未
嘗以語人教子弟諄諄不倦每曰為人當植立貴勢不
可恃也居官當廉謹已欲不可縱也治家當勤儉衆財
不可私也此吾平生之所身履而以望於子弟者其所
存亦可槩見矣君娶李氏先君卒累贈宜人四子皆業
進士光弼以君蔭得迪功郎充四川提舉茶馬司準備
差遣次光遠將仕郎次光裔光顏四女長適迪功郎房

鐸早卒次以廢疾不行次適何如川次適黎時雍皆為進士內外諸孫男女合十九人以淳熙元年十有二月甲寅朔葬于縣之武都鄉光弼等萬里遣來請銘予惟念自幼從先公周遊四方於宗族闕敬方君在忠獻旁時予蓋未省事也丙子之歲忠獻在疚君來省侍于長沙始獲從君語是歲忠獻入蜀又獲欸也顧其氣象猶有前輩重厚典刑足以儀刑鄉黨使後生小子消浮薄之習不謂十九年間不復見君而君亡矣予既憂患之

餘念宗族日落棠棣眷令之詩實感厥心如此又何以
辭銘曰

其德也器厚而不窳其蘊也積實而不窳其用也泉澤
而不淤其傳以銘匪今于古

直秘閣詹公墓誌

自頃國家承平日久士大夫參於寵利無捐軀殉國之
志徇於宴安諱言兵事一旦戎馬入中原相視愕眙不
過為畏避偷生之計仗節死義罕有所聞至其謀國則

以退怯為得筭事讐為全策風俗至此夫豈一朝夕之
故哉然而其間天資忠義務為實用不汨於習俗有志
於當世者亦豈無其人顧有而絀於時論又不克盡其
用為可歎慨若詹公是也建炎初元公通判鞏州北騎
再渡河狙脅陝洛長驅至秦隴將及鞏郡守假它檄去
公即日合兵民七千人授甲登陴敵至城下大呼趣降
公命以勁弩射之圍合數重部分既定歸與家人訣曰
自國門直鞏九郡皆不守吾守死矣竭家貲犒軍謂其

父老曰我已與家人訣爾當共助我皆感激爭出金穀敵盡力攻五日不能破會公所乞熙河兵至與敵戰殺其將三人遂遁去城卒全紹興時苗傅等甫伏誅敵勢憑陵諸將有憤激戮力之意有司顧以調度不給為憂會大饗明堂已下詔矣公時從招討使慨然奏疏大畧謂靖康之禍人神共憤久矣今大敵在前國勢不立與其崇孝饗之虛文曷若厲復讐之大義請停大禮悉以其費佐軍督諸將分道攻守以慰祖宗在天之靈繼志

述事孰大於此事雖不行識者韙之丞相張忠獻公督師遴選時彥首辟公掌機事劇賊楊么據洞庭奉檄先走鼎州度事宜所條上悉中機會方是時敵挾我叛臣日窺邊諸將列屯淮漢幕府議軍事曲折有非文檄所能傳者必委公往諭意析理會情無不切當盖公舊為河州士曹故將王淵為寨主捶將校至死郡守欲加罪公曰小校犯階級是不可以常人論也卒免之王公感激平生事公如父兄張俊韓世忠始淵部曲也故其言

尤為諸將所信忠獻以是任之公善將兵事嘗佐世忠
解濟州之圍行至熙河聞北騎已南公曰卒遇敵進退
何據當駐山陽以俟待之一戰可勝世忠銳意不能從
師至宿遷果潰自是愈心服劉光世之罷兵柄也尚書
呂祉往蒞其軍於合肥公已去幕府貽書忠獻曰呂尚
書之賢固為一時選然於此軍恩威曲折卵翼成就恐
不得與前人比兼此軍今已付王德德雖有功而與其
下鄺瓊輩故等夷耳恐有中不能平者願更擇其偏裨

素為軍中所親附者使為德副以通下情忠獻然其言未及行而鄺瓊以叛聞公明審有謀類如此自忠獻去國和議興公不復用有薦之於時相者時相方謀和亟惡言兵乃曰詹君而賢何乃樂從兵間耶嗟乎是豈知公心者哉及敵暫歸河南地見大夫無可使則又謂公有守輦勞俾以使指往關中時公年高矣親舊爭勸無行公曰朝廷名為撫舊疆吾雖老敢辭乎曰然則無以家行乎公曰人情危疑使者不以家行是重之也即日

盡室引道間關入境延父老問疾苦布德意會敵敗盟
不克終事蓋其慷慨徇義之意至老不衰其為人本末
大畧如此所謂天資忠義務為實用不汨於習俗而有
志當世者若公非耶而絀於時論不得盡其用以死則
可不為之歎息哉予故特表而出之世之君子必有能
辯之者公諱至字及甫嚴州人曾祖瑀贈正奉大夫祖
詢不仕父安學行為鄉里所尊以累舉恩仕為浦江簿
贈宣奉大夫母太碩人余氏公中崇寧元年進士乙科

授泗州推官河州推官徙士曹參軍改秩監在京廣衍
倉通判濰州易南京留臺通判永靜軍及鞏州召未對
除陝西轉運使以親老辭改御營平寇左將軍隨軍轉
運判官主管臨安府洞霄宮起為江淮招討使司隨軍
轉運副使知常州改徽州辟州督府主管機宜文字以
幕府功除直秘閣忠獻將薦于上會太碩人有疾力辭
歸遭內艱服闋提舉台州崇道觀知處州言者希時相
意論公與諸將善坐是罷起為永興等路提點刑獄公

事後復丐祠以崇道歸紹興十年以微疾没于其家之
正寢享年六十有八初娶何氏兩娶許氏俱封令人子
男三人攸之仰之倬之並右從事郎孫光祖紹祖似祖
興祖昭祖女長適迪功郎潘淵明次適承節郎方守中
次適承務郎王興義是歲十月甲子葬于遂安移風鄉
新村之陽積官至左中奉大夫封建德縣男公自幼沈
厚寡言外樸中敏孝友尚義居太碩人之喪鄉黨以為
法育伯兄孤孫如己子孀妹來歸為之區處生事兒女

婚嫁皆得所宗族之貧無所給者曰於我衣食死於我葬以至外姻亦賴以濟度量恢廓喜怒不形而人亦莫敢犯獎借後進聞一善若出於己有不善為之憂委曲諷曉之雖甚不肖亦知愧訓誘子弟不欲傷恩反復諄諄不憚故凡其宗族與其鄉之人生則相與愛敬病則合力祈禳終則至於流涕此豈偶然哉公於書無所不讀讀輒不忘務以躬行為主考論禮樂制度往往得經意尤喜推原歷代治亂得失之故蘊蓄深厚發為文章

雅健追古其得意時操筆如風及讀之雖宿致思者不能及其藁隨多散失所裒拾僅得瀛山集十卷詹氏系本南陽五代時有避亂來嚴之建德者實公始祖也其二子復徙遂安一居遂安之原至公凡九世一居新安之原亦同邑也自宣奉公糾族講學而詹氏始多秀士及公益敦篤懼兩原子弟世遠日踈乃立二老祠每歲季春悉合其少長奉祀事已相與飲酒序親愛以無忘厥初雍雍然也又為之立墓祭之式使後人世守之其

尊祖糾宗之意甚備詹氏人才之盛抑未艾也公季弟
曰棫仕為宗正寺丞於公蓋同志者公之葬狀公行事
甚詳而銘文未有所屬後三十有四年歲在戊戌宗丞
有子曰儀之今為廣西轉運判官與帥張某聯事講學
相好也於是始以屬某而某實公所從忠獻公之嗣子
也乃不克讓為之論次如此而銘之銘曰

猗若人之好脩兮懷瑾而為美也不隨俗而風靡兮厲
秋霜以為志也羌視讐而弗疾兮已獨斯之恥也紛懷

生以自營兮予何艱之避也周旋於羽檄之間兮抑將以伸其義也凜自信之不疑兮曾習俗之何睨也勒銘以昭之尚後人之興起也

通直郎致仕向君墓表

開封向氏自文簡公相真宗天下稱賢其家始大于後欽聖憲肅皇后作配神宗母儀三朝其族益光顯人才亦接踵而出始終與國並昌靖康女真之變二帝北狩衣冠南渡一時仗節死義之臣僅可屈指計而建炎之

元守死淮寧風烈暴白者實文簡四世孫忠毅公也忠
毅死時其家幾亡唯類第四子沈適以逆婦于故侍讀
文定胡公之家獲免於難君即沈也字深之云君生名
門資稟靜厚既受室于胡氏日親文定之教薰陶義理
步趨矩度益以成其德獨痛家國禍難之酷終身於祿
仕蓋泊如也至於春秋復讐之義則不能以忘於中無
路自伸積憂薰心早衰多病以至沒齒識者惜之自宣
和中用叔中奉公子褒恩補登仕郎紹興中始授右迪

功郎監潭州南嶽廟又十五年復為添監釐其務有劉
昉者安撫湖南嘗希時宰意誣奏君叔父秘閣公子志
至是昉復來君即引去適改君湖南安撫司准備差遣
迄不上也君念所生母李氏自淮寧相隔歷歲久遠迎
養禮絕遵律追服率禮無違服除申昇前命言者論忠
毅淮寧之節訪其後人尚書下符促赴闕君以時方多
虞已又抱痾養身崇德無辱其先庶幾足矣希寵徼進
非所願也竟不往前後凡五監潭州南嶽廟最後以上

登極恩轉右從政郎在法選人六考致其事則通朝籍
君覬得以追賁李氏即引疾請會新制止得改次等已
而嶽廟理考故人之在朝列者為之請乃更授右通直
郎致仕拜命才八日而君沒未及為李氏言也聞者尤
傷之君孝友端諒奉先致嚴居家有制為人謀必周主
財用必公制事敏而詳接物簡而和居處服用取適可
而止視外營未趣紛華盛麗舉無足以撓其中蓋其天
資之美而亦薰習之力也君事祕閣如事父間闕百為

備極勤力深愛和氣小心畏忌奉承幹蠱凡四十年人
無間言始忠毅死事朝命官其後六人君以其一奏季
弟鴻鴻蓋淮寧脫死於襁褓中者自餘悉以聽秘閣之
命畀其族人而君之子士行秘閣又以郊祀恩先已諸
孫而及之推此可見其叔父猶子相與情義之篤也故
侍郎胡公寅每咨嗟語人曰若向深之之事叔父可以
為人猶子之法矣秘閣自南渡以來聚族而處甚恩既
沒君復率諸弟守其遺訓綱紀輯睦如初乾道七年四

月十八日微疾没于正寢享年六十有四。是歲六月葬于衡山縣紫蓋鄉梅橋山。祔于忠毅公塋側。君曾祖考綬故西京左藏庫使。祖考宗琦故太中大夫。贈少師。考忠毅公子韶故中奉大夫。知淮寧府。贈通議大夫。賜諡君之配胡氏文定公之女。賢德懿範。為閨閭之表。子男六人。曰士行。迪功郎。前荆湖南安撫司。准備差遣。餘皆天女四人。長適通直郎江南東路轉運司主管文字胡大原。次適將仕郎劉無忌。次適蕭澣。次適趙維。皆進士。

孫男二人公頤公顥淳熙二年士行以大原所狀君行
來曰先君沒四年矣而墓表未立敢泣以請某惟念如
君之賢實中心平日所敬者獨懼文字不足以稱耳而
尚何辭乃為之銘銘曰

有赫其門國之休兮有美其質羌好脩兮被服名教言
行周兮難關百罹抱隱憂兮世所趨慕匪予求兮湘江
之湄獨夷猶兮終莫克知尚奚尤兮曷以詔後表于丘
兮

南軒集卷三十九

欽定四庫全書

南軒集卷四十

宋 張栻 撰

墓誌銘

通判成都府事張君墓表

君張氏諱椿字大年漢州緜竹人曾祖諱紘贈太師冀國公祖諱鉞舉孝廉考諱濩隱德于鄉閭贈朝散大夫妣宜人蔡氏君幼孤家徒四立壁備極艱苦而挺然有志於為善其之祖妣秦國夫人實收而教育之逮長能

自立鄉鄙稱之忠獻公既貴鄉里家事俾君任責君謹
守家訓杜門讀書身率宗族公祖及時先輸無一事至
官府輕財好施勇於為義視親婣之祭祀昏葬不能自
給甚者即助之後生子弟之不率訓者切厲之紛爭不
能自決者平處之小大畏伏屢試進士不遂後亦不復
往忠獻公知其可以居官遂使來南用叔父徽猷公滉
致仕恩補將仕郎君時年五十餘矣旋授右迪功郎都
大提舉坑冶鑄錢司檢校官未上會省員罷故開府儀

同三司劉公錡帥荆南辟為松滋縣令縣更兵火之餘
重以水潦湮墊徙治田萊多荒又地產茶方春他路惡
少私貨者執兵器旁午甚至剽略殺人官為屯禁旅守
要隘盜益羣行抵捍莫可遏止令闕官且十年君得檄
歎曰世豈有不可為之邑哉至則以撫輯為先罷橫斂
絕關禁令商旅通行自如榜諭盜使速自新反其業其
烏合游手願從軍者請於府為效用願耕者官給牛以
為營田盜以是衰則又推廣保甲法而行之民欣然從

令盜無所措足則上其事於朝朝下之府略施行於它縣荆南至今民兵之盛發端自此然君於此思慮極詳密猶恨其說未得盡用於時也縣歲調夫築堤費不貲吏並緣為姦旋即決壞君詳視向所築率退就淺近不當其衝更進塞要害冒大雪躬臨之迄于堅實明年秋大水堤不沒數尺比退無尺寸圯邑人謳歌焉乃新夫子廟宮率諸生講誦公居庫庾次第一新松滋自是始成官府會府增戍官軍符諸邑治舍君獨以不擾集事

敵寇邊它邑人例多逃徙境內獨倚君按堵及將去庫
有餘貲以代下戶租既去人思之轉從事郎中書舍人
劉公珙薦君可任繁劇差如建康府江寧縣縣在府下
應接期會急星火君先立科條示以恩信卒以整治聞
兵部尚書虞公允文制置荆襄辟君為準備差遣用薦
者改宣教郎幕府事有未便輒盡言公命提舉激賞庫
掌庫者武吏公所親信異時無敢孰何君獨勾稽究治
或以為過既代公者乃小人搜剔費用隱微卒不可得

公始歎得君助為多授夔州路轉運司主管文字會轉
運判官周升享傳會大官以舟運蜀馬一路騷動且將
盡核羨財以獻君推誠勸止非一事至其甚不能遏則
不敢署文書且與之辯曰昔稱善理財者不過知取予
耳今知取而不知予獨奈何使者大怒樵吏逼公署迄
不可則無如之何時敷文閣待制王公十朋帥夔素以
剛正自任每多君曰使為屬者人人如張君上之人寧
患過舉耶終身稱道推揚不置已而馬運卒不可行使

者以罪罷且死君致其孥則盡力君在職嘗以臺檄攝
知大寧監半載遠人安之秩滿通判成都軍府事連帥
吏才有餘第所尚或偏寮屬少年爭為刻新以求媚君
居其間處以靜厚其怙勢妄動者輒面折之帥亦頗憚
焉此山之下堰水為利最全獨歲一葺君適董其役盛
冬勞苦不減松滋治堤時或以君年高勸少休君曰民
命所繫使身可寒亦為之何勞耶在職二歲堰獨完方
是時虞公已為相其親郇有為邑府下者自帥以下反

曲意奉之君行縣獨問以職事叱責之不顧平生大抵直諒不回例如此使得高位以行志則其卓然表見者又可量哉以乾道六年九月七日微疾没于官舍享年六十有九累官至承議郎以八年十月甲子葬于縣竹永祚鄉之原配范氏城都華陽人儉順之德實宜于家後公三年没子男三人然迪功郎次熙次留長女適鄉貢進士范子脩策二女適迪功郎宇文紹莊其仲季天孫男四人淳熙三年冬熙以然所記錄其言行走桂林

請予為表予與君同曾祖惟銘之義始於鍾鼎然與史
異記曰銘之義稱美而不稱惡此孝子孝孫之心也至
於後世溢美過甚而無以取信然則宗族之間自為之
抑可信乎予謂惟其實而已實之所在雖親何嫌抑其
親者又觀之審也若夫誕書妄紀雖踈庸何信故予有
此不復辭而如吾兄之賢予實親見而熟誦之於茲之
述盖有所不能盡也嗟夫

訓武郎趙公醇叟墓誌銘

君諱師孟字醇叟曾出昌陵燕懿王之七世孫也懿王
生冀康孝王康孝生丹陽僖穆王僖穆生南康脩孝王
脩孝生崇溫獻公五世皆居嫡長溫獻諱令圖是為君
之曾祖考祖諱子野終襲慶軍承宣使考諱伯莊繇
官郎為外官終右朝請大夫知道州君生而秀異長無
貴驕之習以孝友稱用承宣公恩補官紹興壬子歲調
監永州祁陽酒稅秩滿用宗室恩得監潭州南嶽廟自
是之後寓居南嶽蕭寺中屋僅數椽被服不減寒士無

他嗜好獨與簡編對潛思博攷矻矻忘晝夜其於國朝
法度興革廢置利害靡不周悉至於天文象數卜筮篆
籀亦無所不通論古今事纚纚可聽閒即游歷溪山以
自娛適蓋無復後進意也逮于壬午歲之春先公忠獻
留守建康薦君才可以任事操可以厲貪願易文階擢
寘清近以為公族勸有旨令赴在所而君時已抱疾喟
然曰固願一見君父効愚忠其如疾何且幸得托公族
竊厚廩召而不行國則有刑乃扶持越數驛引疾以歸

蓋自始求退以至于終凡任嶽廟者五主管台州崇道
觀者四其恬於進取如此始君來南嶽會文定胡公之
家在焉君聞所講伊洛餘論而心慕之與文定季子仁
仲先生遊餘二十年其間講論問辨固非一端而君自
謂吾斯終未有所安也故先生之沒君哭之尤哀然而
君方年少時性剛而氣銳遇事輒發不可少忤及見先
生長者以來閒暇靜養至於終歲意象循循寬厚和易
未嘗有忿色愠辭見於外識君者皆謂與疇昔為易人

則學力之所變化亦可知矣于後有室家之戚歷時而情未能遣君頗病之一日晨起灑然有喜色家人怪而問焉則笑不答已而語其友曰吾今而後始為不負此生平時滯吝冰解雪消其樂有不可名言者矣蓋自是以為所得不疑有隱几據梧之意家事亦不甚經念時獨旁觀老釋之書輒然一笑晚苦未疾以乾道壬辰九月十七日終于所寓之正寢享年六十有四其年冬君之友胡寔狀其行使來告曰醇叟不幸死而無子將以

十二月壬寅葬于衡山蘭橋之原惟是所以詔來世者
敢請某念往來湘中熟君舊矣義固有不得辭者重惟
習俗之弊搢紳大夫往往競於寵利而不能自克如君
近出公族抱負才業而退然終身孜孜求道無所歆慕
乎外抑亦可尚也已
是宜銘君積官敷武郎配王氏先
八年卒獨有二女長適將仕郎張衍次適右迪功郎柳
州洛容簿范子文君無恙時或勸宜以時定嗣子君曰
兄弟有子先人不乏祀是亦足矣而識者尤悲之銘曰

世俗爭驚已獨處兮公族烜赫已踽踽兮天資剛強變
寬裕兮夫豈偶然學所致兮生以其常死曷悸兮勒名
于丘示來世兮

教授劉君墓誌銘

前贛州教授開封劉君靖之淳熙五年四月二十四日
以疾没于家後三月其弟前太常寺主簿清之塋君于
廬陵先墓之側書來請銘頃予居長沙聞章貢有學官
始至登講肄之堂視其旁列繪像凡五六皆近歲太守

部使者即日撤去進諸生而告之曰若亦知濂溪周先生嘗通判是邦乎先生百世師也學者所當尊事於是以其處為先生祠使誦習其書問其姓名而知君之為賢今得清之所寄行錄一編大抵皆贛之士紀述君之言行謂君之教人首務正其趨向月校其士以行義為先視其文論治道而尊管商談學問而涉佛老言時事而忘讐敵者必痛抑力排之終日坐直舍雖休沐亦或不出講質問辯者相踵與之反復無少倦有一善輒屢

獎而申勸之有不善為之愀然曰吾教之不至也以故多所感動凡學之事小大悉有條理致其鄉之老成者使分教席下向有濫居其職者輒漸自引去士爭趨于學益市書它州使之讀而丐增其廩以食之自太守部刺史以下見其懇惻無敢有紊其學政者故君得以行其志願之士知有為己之為重恥言利而趨於義君之教為多故其去官爭欲畱之而不能比其死奔走往哭又爭為紀其言行欲其有傳夫豈偶然也哉予於是而

歎君雖在下位而能不苟於職如此且觀其所以教而知其志之遠且大也則為按其錄而書之君字子和本臨江人五世祖太子太保式自臨江歸京師曾祖敦故朝議大夫贈太中大夫祖武賢故承議郎考滌故通直郎致仕母趙氏君資稟冲淡而溫厚中紹興甲戌進士第初任吉州司戶參軍兼掌獄事即不為詭隨更尉邵武上官文符之下有病民者不輕以行及得贛學教授待次凡五年益用力於經史講論先覺師友淵源及其

居官則推己之所從事者而與其士共之秩滿改官遭繼母裴氏憂未及禫而君死矣病且革戒其家曰喪事勿用異說享年五十有一娶趙氏有子曰仁季女一人惟劉氏自國朝開基以至於極盛之際世有顯人名在國史忠厚雍睦之風相傳以至於今世系益遠而家法不衰君之兄弟又能克篤其敬相勉以道義藹如也大家子孫能世守如此者其亦鮮矣予雖未識君兄弟而與君之弟相與書辭往來有講論之好來求銘君墓至

五六辭甚苦有不得而辭焉銘曰

世之論者以郡教授為不急之官以予觀之使得其人則於其州可以成才而善俗顧不急哉顓之學自紹聖間有賢者曰李朴先之實臨其官今八十有餘年矣而士猶稱之不衰及君又見稱曰是可繼先之也豈不賢哉予故表而出之

欽州靈山主簿胡君墓表

惟建州崇安胡氏至文定公而始大其上世皆居里中

文定公宦游荆楚歲久皇考宣義公淵沒塋于荆門紹興初因徙家衡嶽之下於是二弟寔從仲曰安止仕為朝奉郎生子寔字廣仲是為君君雖生晚不及親受文定之教而自幼敏茂氣識異於常兒年甫十五從家塾習辭藝從兄五峯先生宏察其質之美也從容告之曰文章一小技於道未為尊所謂道者人之所以生而聖賢得之所以為聖賢也吾家文定之業子知之乎君拱而作曰某不敏故竊有志乎此願有以詔之先生嘉其

志樂以告語君雖素羸多疾而矻矻自力不肯寘由是
所見日以開明先生之沒君獨念前賢淪落且懼緒業
荒墜慨然發憤見於辭色孜孜訪友惟恐不逮講辯反
復以求至當議論貴決白不為含糊模稜態其居家雍
睦而有制閨門內外無不敬愛之或誣其所以致此則
曰家道之失和平皆由小知自私害之吾一以公心惻
怛居其間故無事耳始朝奉公沒時幼子寓僅垂髫君
撫育教訓恩意甚力輕財好施意氣豁然舅之子貧無

所依君收養之終身以至族姻之不能自振者賴君區
處調護非一而其好善疾惡亦本於天資親朋有過盡
言不隱雖甚愚室不忍棄必反復開導至其以非意相
犯則恬不與較平時誦習文定公春秋之說尤患末俗
統系殷辭每舉莒人滅鄆之義言意深切其操心主於
忠厚為學謹於人倫貴實用而恥空言行事之可見者
大抵如此早以門蔭補將仕郎殆將二紀約居恬然不
急仕進近歲始就廣西銓選得欽州靈山縣主簿亦未

上也乾道九年秋因事至湘陰得疾堅痞在腰股間醫者誤以快藥下之則益甚亟歸舊廬以十月庚辰没于正寢享年三十有八娶黃氏知鄂州抗之女子男二人大同大有皆幼一女才及笄君之没士之識君者莫不為德門惜君之賢至其所居鄉里之細民亦曰何善人之不壽也予與君交幾十五年志意相合歲時會遇與夫書尺往來無非以講論切磋為事則予之惜君又豈常情可比哉嗟夫學者之病固非一端以予觀於近世

其大者有二焉貪高慕遠則不能循序而有進負己自是則不能降心以從善是二者抑學者之所甚病也數年以來矚君熟矣蓋務實趨本自反於卑近而虛中求益不私其故常予是以知其所造將不可量也孰謂天之降年止於斯邪學力而未極其成才高而未著於用予之所深痛也予豈不知脩短之有命耶是歲十二月癸酉塋于衡山縣雲密峯之東從其先君之兆其友同郡吳翼以狀來求表墓明年乃克為之淳熙改元九月

戊申述

吳監廟墓誌銘

予自為兒童時即識吳君子通胷中坦夷善談論豈弟人也平時游公卿間以忠信自將一見即款熟久不以榮悴改自予先公與丞相趙公當國開督府嘗辟君蒞軍士之食及有疾病者逮予家居湘中君還自北即復來登門先君貶陽山陽山窮僻多癘氣時秦檜擅權焰烈原火忌疾特甚先公屏居闔閭不與人相聞雖向來

故吏亦有莫敢以書至前者君獨屢入嶺求見見必留
久而後去年歲間必復來太夫人在長沙君來南必待
安問復視先公飲食顏色寧健否歸以告君又與樞密
折公善折公貶郴君亦每道郴問勞款曲方憮人帥潭
網羅善類搜抉細故以諗檜君堂堂往來遷客間自若
不顧也先公與折公皆作詩稱道之其激義蓋如此君
諱芾子通字也其先自武夷徙家湘潭曾祖惟忠祖仁
信父仲明皆業儒君少而孝友既孤事母訓弟有聞于

其鄉母病瞽踰紀君精意療治一日復明如初人以為
孝誠之感也游京師聲譽籍籍縉紳間廣西經畧使呂
源辟君自布衣補官為屬凡所以資源者甚至其可知
者如料莫公晟有它意欲消患未然及并省平觀二州
以寬支移之擾力行法禁以革泉貨出徼外之弊廣人
稱之盜曹成破臨賀餘黨未去君以檄疾馳入城保其
資糧數十萬得無失使者議狀其功君力辭焉出嶺調
官既入督府復就版曹辟為諸路回易總領司主管文

字已而從路公允迪往南京陷于敵深自晦其能亦屢以疑似坐獄不為屈竟得脫歸請祠返故居遂不復出仕矣君論事纚纚聽者忘倦練習典故法令以至山川險易財賦本末出入皆甚悉而又特精於醫始君少時父病瀕死而醫無良且玩視邀重利君慨然閱素問岐伯盧扁之書久而得其妙視脉如洞見五臟詳察其所以然而投之劑無不應如甘蠅飛衛之射郢人之運斤蓋心悟神解非庸醫守紙上語者所能睥睨髣髴也計

所全活不可勝記在京師時士大夫私識其治法成書相傳以為異及歸湘中鄉黨尤賴之人有持金帛報者即謝不敢受家四壁立處之澹然紹興辛巳八月五日終于家享年七十有五是歲是月祔于先塋實衡山武陽鄉娶黃氏先君卒再娶陳氏子以宗林宗元宗孫伯騏伯熊伯驥女長適奉議郎李玆次適左迪功郎弔州教授王起宗季適進士曠楊林宗屢來求予誌予自念往在瀟湘君每登堂拜太夫人予以綵衣侍重親俯仰

十五年間風木之悲遂成永感撫事追昔痛如何言而於君之誌有不得辭也又念予嘗從先公旁聞君道敵事甚詳云人心厭金思念我宋不忘見父老屏處聚語有或至流涕者嗟乎此非國家它日恢復之本邪近世士大夫計較利害強弱畏之如虎曾不思天下莫強於義理況祖宗德澤滲漉之深耶予因叙君事憶君所嘗道者而喟然有發於斯言云銘曰

嗟乎體魄藏於斯魂氣則無不之也咨爾子孫歲時瞻

省以謹以護致饗于家以敬事以無忝於嗣

教授魏元履墓表

故台州州學教授魏君元履之喪新安朱君熹既為之志以內諸隧而其子孝伯復以書來請表于墓某雖聞元履之風而未及識獨時以書往來相與之意盖有不及待傾盖而得者又聞元履將沒若以此屬於予則於孝伯之請反之於心誠有不能已者故不復敢以荒陋辭元履諱揆之舊名挺之後更今名則字子實然以元履

行今為建寧府建陽縣人父大名隱德不耀故禮部侍郎胡公寅嘗志其墓述其世系甚詳元履自幼立志不羣方是時建寧多儒先長者元履始入郡庠事籍溪胡先生憲先生器之已而遍從諸長者游間又適四方所交一時名卿賢大夫多大人行故聞見日廣而聲稱亦日著其為學慨然企慕古先於書無所不講而於歷世治亂興亡得失之故與夫本朝故事之實尤所諳究為文章長於論議善談說聽者無倦其居家孝友恂恂謹

喪祭重禮法於親卹卹死守孤雖貧極其力而為之其
居鄉遇歲饑則為粥以食餓者且請於官為之移粟閭
里賴之視鄉人有不葬其親者請富與之期貧與之費
賴以掩者亦以千計其有不舉子者則為文以告戒之
細民亦多為之感動其與人交盡其情然不為苟合長
善救失惟恐不及後進有一長必亟稱而力推之位望
尊重者苟有不合已意亦面質不置大抵其為人於義
最隆也方年壯時游江淞間過衢客郡守章傑之家會

故相趙忠簡公之喪歸自海外傑雅以私怨趙公且希
秦檜意逮治其家人勢烈如火元履獨慨然以書譙傑
長揖而去傑亦無以害也其天資疾惡勇於為義類如
此元履兩以鄉舉試禮部不第福建路安撫使汪公應
辰知建州陳公正同知其賢相與論薦復為時相所尼
不得召居數歲詔舉遺逸轉運判官芮公曄率其僚與
帥若守六人者以鄉人所狀行義聞有旨特徵之時宰
相陳公俊卿實當國也元履辭既不獲乾道四年十二

月用布衣入見條當世之務首論脩德為立政之本繼以正人心養士氣為言以為恢復之道要必以是數者為先上獎歎開納勞問移晷翼日詔賜同進士出身授左迪功郎守太學錄異時學官多養望自高不與諸生接亦不復省學事元履就職則日進諸生而誨語之視其屋有弊壞弗支者亟請于朝而葺之其春釋奠于先聖職當分獻先賢之從祀者則先事白宰相王安石父子以邪說亂天下不當祠而河南程氏兄弟倡明絕學


以訓方來其功為大請論奏屏去王安石父子而追爵程氏列於從祀為允它日又白太學之教豈當專以浮言取人宜隆德行尚經術其次猶當使之通習世務以備官使皆不聽元履念上恩厚言雖不見用未忍去也於是時事有係安危治亂之幾而自宰相以下無敢救正指陳者懷不自己每抗疏力言之至於三四不報則移疾杜門以書切責宰相宰相病之遂因元履之請予告使歸既行則罷為台州州學教授五年六月也元履

歸而喟然曰幸得遇明主學力未至無以感悟効報萬
一當益自勉而已舊榜其書室曰艮齋至是日處其間
紬繹舊學將來其所未至士子有從之游者亦不之拒
而元履病矣病且革顧念君親處理家事無一語謬其
母游氏視之不巾不見也戒其子毋以僧巫俗禮浼我
招其友朱君熹至則盡以終事為託以九年閏月壬戌
沒于正寢年五十八娶劉氏同郡徵士勉之兄女先十
九年卒再娶虞氏子男二人孝伯長國學進士孝聞尚

幼所為文章及論議合數十卷藏于家嗟乎習俗之弊
久矣惟一已之便利是圖而其它有不遑卹也若元履
平日制行以急病讓夷為心一旦起布衣有列於朝則
無隱君父言衆人之所不敢言其比於區區自謀者相
去豈止十百而已哉而世或以近名譽之抑昌黎韓子
所謂怠與忌者非邪雖然使元履而天假之年益充其
所志以進其所願學則其所成就發見又豈止於是而
已邪予是以歎惜而書之淳熙元年五月戊申廣漢張

其述

卷四十



南軒集卷四十

欽定四庫全書

集部

南軒集卷四十一至四

詳校官庶吉士臣吳烜

主事臣呂雲棟覆勘

覆校官中書臣宋 銘

校對官中書臣范 鑒

謄錄監生臣戴祖暉

欽定四庫全書

南軒集卷四十一

宋 張栻 撰

墓誌銘

宇文史君墓表

君氏宇文諱師獻字德濟世為成都人曾祖宗象贈太師魏國公祖邦彥任尚書屯田員外郎贈太師蜀國公考粹中任尚書左丞系封南陽郡公贈少師宇文氏受姓系世之詳已見於少師墓碑故參知政事楊公椿之

文始少師與其弟簽書樞密院事虛中俱以文學論議
被遇固陵極翰墨之選熒然一時少師晚歲歸安于蜀
盖倦於世故矣長子師牧賢而有文不幸早世少師念
之甚君是時方童稚已挺然不凡日讀書講問娛侍于
前少師每為慰釋謂是兒且長殆能繼二公之業少師
故時賓客多英俊見者莫不竦然謂宇文氏復有子矣
少師捐館舍君甫年十有二執喪盡禮如成人事妣福
國夫人黃氏奉承顏色不懈而自奉極儉薄人不知其

為貴公子也季父直龍圖閣時中素重許可尤器君懋
以問學先用樞密公恩補承務郎服除差監潭州南嶽
廟考滿知漢州德陽縣丞改知綿竹縣丞暇則慕崔斯
立之為痛掃溉以種學績文為事且從其鄉之老成故
工部尚書員外郎李公良臣及其秀士黃鈞李流謙游
聞見益以廣聲稱益以著已而兩丞銓部以微文俱不
報更從外銓擬監漢汁祁縣酒稅居其官惟謹改監漢
州在城商稅務未上會詔從臣各舉所知楊公椿時為

尚書兵部侍郎以君博學有守聞有旨召赴行在時紹興三十年也君念福國夫人年高不忍遠去力辭差潼川府路提舉常平司幹辦公事未上改成都府轉運司主管文字丁內艱哀慕幾不能自全免喪楊公已在政府力挽君陳下亦竟不前差四川安撫制置使司幹辦公事歷事兩帥其前者寬縱多慢君據義不撓其後者威嚴或過君彌縫其闕幕府歸重先忠獻公雅知君言於朝遷知簡州簡故少事君復臨以安靜民甚便之歲

歉饑民為盜連數郡君所部先事區處得食迄無從寇者以暇時掇論時事之要編白於朝宰相亟稱之未滿秩移知綿州縣為大州適承頽弛之後帑庾匱甚君獨整科條察蠹弊節用度未幾而經常不缺郡舊有冤獄佃人殺主之僕而誣其主外臺執偏見不釋主家死於獄者三人其它亡辜逮繫死者又以十數方春天為雨雪地為震歷兩使者不能決更送君所君詳究其牘得情數語折之佃人引服致之法人謂可以少謝死者冤

也事益省即理緝學校舍其士者行鄉飲酒禮使敦長
幼之節在郡再歲樞密使王公炎宣撫四川以請改知
閬州錫贊書甚寵閬故嘗為宣撫使所治地尤重事且
夥君先立之規模上下趨令惟恐後率以夜漏未盡數
刻秉燭出視事不以為勞亦不覺有疾苦狀一夕與客
評論書史自若既寢家人輩聞喘息若不屬亟視已不
能語醫不及進藥而終享年四十有七實淳熙元年七
月二十日積官承議郎以郊恩賜五品服娶郭氏故朝

議大夫知辰州黃中之女子男一人曰紹訓女二人長
適唐剛文次許適梁秩皆進士是歲十有二月晦歸葬
于廣都縣靈溪鄉附于蜀國公塋側君天資忠厚平易
與人交久而不厭或少忤亦未嘗衰家居婢僕不見其
惡聲厲色而至蒞官之際則簡嚴自守所謂柔而有立
者伯兄既早世事嫂甚謹待猶子恩義無間言嗜讀書
稽考至忘晝夜論事貫穿今古為文辭贍蔚有餘地所
著甚多藏其家初君以二文世科為念刻苦習進士業

為進士者多推稱之兩以鑠聽試類省輒下益力後雖
已領州符猶不置蓋終其身以是為歟某嘗以謂自先
王教胄子之法壞大家世族不得盡成其才其下者苟
從祿利不樂親文墨事至其間讀書欲自表見者則又
不屑其世祿顧反以從進士覓舉得之為榮噫昔之人
所望于胄子者豈為是哉若君居家孝友涖官廉平溫
厚博雅于以進德孰能禦之顧區區猶以是為歟何哉
某之先妣夫人實為君從女兄故某於親鄙間講聞君

行義為詳紹訓奉其母命萬里致書請銘不敢辭銘曰
宇文入蜀三百年支垂派別族益蕃少師弟兄大厥門
迭執鴻筆司皇綸二府聯登體貌尊君生其家愿而溫
被服儒素遠世紛編簡浩博資剖論部符三州民所恩
外若坦易守則敦人言餘慶茲實存誰其挽之排帝閭
哀哉王立歸丘原萬里方駕厄其轅尚有銘詩賁來昆
承議郎吳伯承墓誌

乾道六年七月十八日右承議郎浦城吳君卒于長沙

之寓居年五十二其子洵以治命奉其襄祔君之母夫人方氏之兆其年冬遣書走告于尚書左司員外郎侍講張某曰先君蘊蓄不克施懼遂泯沒相與厚善莫如公惟是所以詔來世者敢再拜哭授使者以請某讀其書泣而諾之君諱銓字伯承大父朝議大夫獻可以科第起家父奉議郎知常游於諸侯幕以才術聞君以大父恩補官嘗兩試春官及宏辭科筮仕監潭州戶部酒庫其調江陵簿及知巴陵縣事皆以故不上而奉祠南

獄及崇道者前後凡五中間用薦者改秩暨覃恩遷官
賜五品服所歷僅如此君事親孝謹終喪即澹然無復
仕進意不忍遠墳墓朔望展省嗚咽迄終身不衰天資
狷介質直疾惡如讐不妄交少不如己意輒拒不納親
黨朋友有過不忍茹即告語之以此為賢者所重愛而
其間不知君者亦往往怨訕君不恤也遇其急難困苦
死喪輒推衣食資財以助無吝色築居湘濱有亭榭華
竹之勝而名其堂曰思親蓋其終身之思誠敦篤乎此

也嗜讀書吟誦日夜不息深於離騷為詩慕陶謝紆餘
閑澹之趣其思甚苦至所得意心開目明忽不知歲月
之度也以是居湘城蓋幾二十年君娶万俟氏右僕射
高之女初僕射自沅州召還將倚以為相道長沙君為
言天下事極剴切且勸以無畏縮不言負上及僕射得
政數以書招君卒謝不往親若舊有官於朝者即不欲
以書往來然其居閒每慨然有憂時之志為政于潭者
往往就君問所宜君為言田畝間民所患苦未嘗不織

悉反復若有闕失亦未嘗隱方其仕時部使者雅聞其名交薦之其間有不可者輒謝不受方曰士固當擇所託也能自立蓋如此病且革無它言獨勉其子以學且戒曰我死毋得用浮屠氏是亦可見其所存已長子洵將仕郎次沂幼未名女三人孫男梓予與君寓居鄰牆間一二日輒步相過議論酬唱甚樂別未一載而遂志君墓悲夫銘曰

有特其資不假其施有蔚其文不顯其聞歸于其宮曰

從于親尚其孝思以永嗣人

賈仲山墓誌銘

乾道庚寅之歲新零陵守賈君訪予于休沐舍泣且言
曰森之弟仲山不幸不起疾念其沒且無聞以嘗獲從
游敬請志率五六日一來請自予居湘中有年所矣始
聞仲山兄弟居家友睦愉愉如也已而皆識之久且厚
予讀書城南仲山適亦葺其居與予鄰日相過也去年
予來守新定仲山跨馬送予渡湘行數十里不忍舍予

顧見其形色特瘁且丁寧勞勉之別未半歲而以訃聞
予固悲之而其兄之請勤懇如此予雅重其兄弟平日
相與之歡又不忍拒其兄之請於是乎書君諱林仲山
其字也其先真定人後徙鄭自鄭徙鄆才四世曾大父
公直仕為中散大夫大父諱節為顯謨閣直學士顯于
時父澡為通直郎母張氏君蚤歲能屬文長而值靖康
之亂奔馳江湖間晚以叔父瀛死事恩得初品官歷撫
州宜黃縣主簿邵州軍事推官所至以能稱其聽訟剖

折迎忍大抵得其情歷陽張孝祥治有聲于時其守撫
及安撫湖南率致君任以事輒辦率部使者薦于朝改
宣教郎調知常德府龍陽縣事未及上享年五十有三
君一子甚慧年甫十二而夭又一歲而君沒為可傷也
已君喜讀史居閒自抄九數十萬字皆成誦云銘曰
聚散氣也脩短命也始終理也氣不能不離命則不可
違而理則萬古之真也

張氏墓表

建昌南豐曾氏近世有君子曰發字信道仕為吉州教
授友睦之行推于其鄉鄉之人皆謂信道固賢抑有內
助以成其德焉爾信道之配張氏其先舒州人曾祖鼎
臣贈太子太傅祖復貫贈太子太師父激故朝散大夫
知南安軍夫人幼孤鞠于叔父尚書右丞激之家天資
靜肅不妄笑語右丞公賢之親為擇配信道時為掾臨
川中書舍人呂公本中尚書郎計公昕亟稱之遂以歸
焉曾君之父樂施家以施而遺夫人自貴族入其門躬

履勤儉不忽細故莊敬而順喜怒不見於色小大無間
言信道既沒教子持家弗墜厥訓晚歲家益饒而夫人
約素不改其舊寢帷至四十年不肯易一簾亦更十餘
年完緝殆徧今其家俱保藏之以訓示後人然在夫人
秉德有常非其所勉強然也淳熙二年天子奉觴前殿
推恩海內夫人以子擢故得封太孺人後一年而寢疾
一夕語家人輩曰吾病殆不瘳矣衣在某笥衾在某笥
宜亟治具又曰某嫗吾嘗使之織未歸其直宜卽償之

明日又視具曰毋哭徒溷我迺終蓋其平時專靜故死
生之際能如此是歲十月甲申葬于其鄉龍水之原子
男五人長曰持次擢登隆興元年進士第從政郎前荆
湖南路安撫司准備差遣次挹擴擬女嫁文林郎洪繫
孫男八人克冕覽允寬允餘未名孫女七人擢在湖南
時從予遊狀夫人之行來請銘不得辭銘曰
專靜而常惟婦之臧儉德之光世篤勿忘

宜人王氏墓誌銘

淳熙二年秋安陸宋文仲與其弟剛仲書來告其母夫
人八月辛酉沒于袁州教授官舍以喪歸葬求予銘予
辭未果又書來曰閏月癸酉既畢窆事矣敢請立諸墓
為辭甚哀予念文仲兄弟從予游有年矣其哀亡已誠
不忍拒也則為之書夫人姓王氏六世祖太傅明佐藝
祖有勲勞在太史曾祖臨事仁宗為寶文閣待制祖承
提舉利州路常平事父恪為漢州雒陽令母解氏夫人
適右朝議大夫知德慶府宋許生兩男子文仲迪功郎

全州清湘縣主簿剛仲迪功郎袁州州學教授一女適承事郎監饒州景德鎮稅万俟傳孫男女凡七人累封宜人享年五十有八德慶君之沒先夫人九年葬于衡州衡陽縣五馬山之原夫人之葬寔合祔焉夫人幼孤事母稱孝既嫁事姑以恭肅聞相德慶君周睦内外有恩意德慶君沒處家事嚴整教子有法度見族鄙飢寒者矜念施與惟恐不及平時待接長幼一以忠信為主聞人有善喜見辭色再三為其子言之不置按文仲之

述其大概如此徵諸親友之所聞無異乃係以銘銘曰
惟宅之安無有後難惟安且久以石厥後

故安人常氏哀詞

晉原鮮于廣大任少母安人常氏大任在襁褓而常氏
去其家既冠而知之則常氏沒矣大任追念哀疚蓋骨
立宦游四方中歲歸故里重惟生不得其養沒又不知
其處無以塞其悲也寄書友人張某俾為詞而紆之詞

曰

孰生無母兮予獨甚悲赤子婉孌兮母實鞠之哺乳以
節兮燥濕是宜子不能言兮母實心之冬之冽兮母予
溫之夏之炎兮母予涼之母實瘁兮兒則肥嗟母之恩
兮曷其報之子匍匐而欲步子嘔啞而將語子未能識
母兮母胡為而舍子而遠去子則於母兮何知諒母心
兮念兒以忘饑年燈燈而浸長兮以思撫子躬兮曷自
孰告予以所從兮乃始滂乎其以泗宗有承兮義則貞
堂有君兮恩或難伸逮子既克知兮則母已逝而不可

見矣予惟罔極之哀兮其曷予已嗟乎母生子不得婉
愉於膝下母沒子不得俯伏于幽宮徒白首兮鄉社滴
清淚兮何窮地久兮天長日升兮月常嗟乎此天下之
至情也固爾難忘

南軒集卷四十一

欽定四庫全書

南軒集卷四十二

宋 張栻 撰

祝文

祈雨

服嶺以南土剛而農情夏秋之交數日不雨已或告病
求神雖瀆理不容緩伏惟矜惠下民早沛甘澤周及四
境俾克大濟豐年之報敢不敬修

謝雨

近以農夫望歲有請于神蒙神降沐沛為甘澤浹洽周徧一稔有期更惟神惠終以幸賜吏當虔恭益思不懈

以承靈貺

堯山離江自降沐下云應不旋踵沛澤周洽

祈晴

霖雨連仍勢猶未已深虞浸溢有害秧麥早夜不遑用走控告伏惟矜此下民賜以開霽惟神之惠俾克敬承吏之不恭敢不修省

祈雨

春且盡矣民將蒔田而時雨少斲土膏不滋歲事所係甚重是用奔走控告明神伏惟矜憐沛以甘澤周徧浹洽克濟南畝寔惟神休吏之不恭敢不修省

謝雨

涉春以來時澤未應深虞農事之艱奔走控告神答如響雷行雨霈連日未已民得以服事南畝吏得以少寬百憂神之賜其何以報雖然苗既蒔矣將秀之既秀矣將實之實而堅獲而周始得以徧充吾民之腹而克應

公之須然則自今以往歷夏及秋雨暘之節各適其可
無或少愆而後吏之責塞不至數瀆于神其實惴惴焉
惟民之凋瘁方歲之豐猶或不舒惟神之聰明其所臨
饗實依乎民吏或有罪願止罰于身而無貽于民也

祈雨

惟今之歲賴神之休早稻既穫矣而彌旬不雨禾之晚
者秀而未實一簣之功正在今日是用奔走控告沛澤
之賜惟神終惠之

祈雨

惟茲晚稼既視其生長以至于今亦且穗矣必待一雨之沛而後成實乃或靳焉害于垂成惟神之仁獨不矜此豈人事有以干陰陽之和歟政有不平刑有不中驕怠之或萌實長民者之責惟民之寡弱獨何與此盍降罰于吏而苦其民今茲一日不雨則有一日之傷事既迫矣號呼于神惟神其哀念之

謝雨

近以時雨有愆祈請于神蒙神降休應以甘澤尚祈終
賜俾遂有秋敢不殫誠仰祇神惠

祈晴

維時初冬氣當曄歛迺者癸酉之夕雷電交作陽縱不
收繼為霖雨亦既彌旬穀之登場者未暴深虞其積而
壞也用走祈于神所冀開霽以成其終導和致順無為
民災敢不敬省人事以承休嘉

謝雪

此用之祭社其祭稷神前四句云惟稷有
神司我下土幹旋生育功用莫禦餘同

惟邦有社實司其土闔閭陰陽呼吸風雨民所憑依國
有彛禮凡我命吏敢不敬事茲冬而溫氣或乖忤陽驕
不收壤燥靡附來牟何貽癘疫是懼奔走以告俯伏偃
僂先以嚴霜知神意許釀陰連朝雲同天宇粲然雪花
上下飛舞風無虐號氣有和豫載積載零遠近周溥沴
氛一空嘉祥來下音物意昭蘇土膏沮洳既釋近憂亦
寬遠慮嗣歲其有兆端已豫何以報神正直是與勿替
引之神日聽汝俾我大田有富無窶嗚嗚其歌坎坎其

鼓農夫之誠神所惠顧

祈雨

維茲之歲已屆暮春時澤未洽麥苗就稿穀種不入人心皇皇吏用恐懼奔走以告惟神之仁哀此下民沛以甘雨雷動風行周溥霑足以開有年敢不敬恭克承休德

謝雨

近以時澤未應控告于神惟神哀民之生賜以甘雨俾

克舉趾于南畝為惠曷勝惟是自茲以往農事日興所
望雨澤相繼仍迄開于有年惟神幸賜之以不倦惟吏
恪承之弗敢怠惟民欣戴之何有極

謝雨

近以雨澤未溥荐有控告賴神之靈連獲嘉應久燥之
壤悉得就耕謹再拜以謝惟是農事之難自茲以往苗
而秀秀而實所仰於雨澤大需蓋源源也惟神幸終賜
以成有年謹再拜以祈

謝雨祈晴

夏至之日某以南畝望雨控告于神賴神之靈應不旋踵今既半月沛澤不翅有餘矣而連綿不已陰氣未收復懼為下田之蓄是用再有請于神望即開霽以終其賜夫久晴而祈雨積雨而丐晴其為請誠若無厭者惟神矜此下民赦吏之瀆而有以俯徇之自今以往伏願五六日至于旬時雨暘相須無過與不及保我嘉穀以迄于有秋則實拜神之惠吏之修省其敢弗虔

秋祭

茲以素秋恪修常事在禮所當報而不祈惟是中秋以來久愆雨澤今稻之傷者雖不及事然土壤堅燥澤氣不升實預懷嗣歲之慮敢因以請早賜甘澤兆開豐穰實惟神之休

社壇

某被命來守此邦政有關謬願降災於厥躬而無以疵癘于斯民惟明神實鑒臨之

社壇

某恭承皇命來守遐藩視事之初祇見壇壝惟神克相
惠綏此民政有乖戾罰止某身

社壇

惟雨暘寒燠之時與不時雖司乎神而寔係於人之為
某以不敏來守此邦懼智慮有所弗逮惟神寬之至其
自作之愆則願降罰于身而無以傷乎民則惟神之明

楚望

名山大川神靈莫測望祀之典敢不敬恭肇始二壇用
伸祈報惟神歆格佑我下民俾雨暘時若歲事登濟罔
有苗害以闡神之休惟吏謹當率民奉事自今以往終
古無斁

烏龍山神

竊惟古者諸侯各祭境內之山川嚴其壇壝潔其幣牲
以致吾誠焉耳後世立之棟宇設為像貌其失甚矣仁
安之山實鎮茲土風雲變化雨我百穀是為神靈民所

依賴而嚴祀之所曠然未講其何以收聚誠意克有感
通肇建茲壇亦既訖事謹率僚屬再拜以祠惟神昭相
俾雨暘以時嘉生無癘吏雖不敏敢不率民敬事永以
無替亦惟神之休

諸廟

其被天子命來守此邦靖共爾位正直是與顧雖不敏
敢不敬斯言惟神實鑒臨之

祭勾芒神

惟時新春陽氣肇舒乃出土牛以首農士致祀于神實
曰彛典惟神孚祐時其雨暘順乃嘉生賜以豐年其敢
忘神之德

祭海陽山

嗚呼海陽之山呼吸雲氣維邦之望而民所恃嗟嗟晚
稼亦既成穗屬時驕陽垂成莫遂惟神至仁矜此憔悴
觸石膚寸一境是庇沛為甘澤成我豐歲孚于下民永
答神惠

祭諸廟

惟茲稼穡幸底有年戴神之休敢忘思報謹以季秋聿修常事惟神鑒臨終惠賜之

唐虞二帝

茲以素秋恪修常事威顏不遠俯伏祇承

離江堯山

在禮諸侯得祭其境內之山川惟山川之靈能出雲雨故為禱祀之所依堯山離江此邦之望也而壇壝未立

修敬無所茲以夏秋之交近旬不雨農夫望歲之切用
敢瞻望再拜以致悃誠且遣官僚捧祝以告伏惟神靈
惠孚沛為甘澤俾克有年圖報之修其敢復後

秋祀堯山

茲以季秋萬寶告成謹遣官僚敬修常事仰惟神靈賜
以鑒格

堯山灘江二壇

惟江山之神實為此邦之所瞻依而壇壝禱祀無所其

用是懼虔度高明之地肇新規模及茲而成謹率官僚
俯伏以告惟神孚鑒佑此下民俾歲屢豐物無疵癘吏
當率民敬事其永無斁

虞帝祠

惟斯民之所以生斯世之所以立翳人倫之教是賴而
聖人實人倫之至也帝之盛德冠冕萬代固豈下臣所
敢贊述蒼梧之野謂帝嘗臨寅緣此邦獲奉廟祀其蒞
官之初適修常事周祀棟宇缺壞弗稱悚栗汗下不敢

荒寧肇新規模茲焉獲考敬率官僚俯伏以告惟帝之
澤化育並行動植蒙賴何有窮極敢云此邦獨私其賜
有虞氏二妃

惟神唐帝之女嬪于有虞協德聖神垂則萬代新宮肇
建內閭是嚴修祠于春敢率彝典

大成殿

其以愚陋被命臨民早夜恐懼未知所濟惟當精思聖
經之法言體而行之庶幾萬一得寡於罪悔視事之始

敢祇見于學宮

文宣王

某恭承皇命來守遐藩視事之初祇見于廟為政之方
備嚴經訓雖曰不敏敢不夙夜敬思力行庶幾萬一

先聖

某以承學濫茲為邦視事之初祇見于廟佩居敬行簡
之言推學道愛人之志雖曰不敏敢不夙夜庶幾萬一

先聖

廟學新成謹率僚吏與鄉之士行釋菜禮敢不再拜稽
首思所以祇若明訓

先師

廟學新成謹率僚吏與鄉之士行釋菜于先聖敢以先
師充國公配

先聖

茲新棟宇亦既告成敬奉神像即安于宮

蜀漢昭烈帝祠孱陵

惟帝痛宗國之荒墜憤讐賊之憑陵顛沛百罹信義不
舍至於賢哲願為之佐英雄樂效其死規模宏遠夫豈
偶然天若祚漢豈無其成雖曰不終正理曷泯眷言茲
地昔所遲回風烈猶存焄蒿悽愴有廟以祀典禮則宜
藩臣經從敢不修敬

嚴子陵祠

某以愚陋被命來守此邦竊仰先生高風於千載之上
視事之始恨拘印綬不得躬走祠下敬遣迪功郎嚴州

州學教授鄭某往致一奠

祭嚴先生

某竊惟此邦之所以重於天下者以先生高風之所存也雖舊隱之地祠像具設而學宮之中烝嘗獨曠其何以慰學士大夫之思乃闕東偏肇始祀事嗟乎世遠道散寵利相希而事君之義益以不明惟先生曾不以一毫動其中啟世祖貴德尊士之心成東京砥節厲行之俗施澤遠矣翳我多士克承繹之

丞相萊國寇忠愍公祠 公安

國有大議發言盈庭紛紛鄙夫蹙縮經營豈國之愛惟
謀厥身從違之間興喪所分不有英哲孰相其成一言
之決九鼎莫傾允矣萊公社稷之臣定計澶淵功垂日
星匪功之艱其見克明惟見之獨勇莫我嬰黃蓋一張
蟬賸震醒是曰廟勝豈幸之云彼纖雖巧寧屈其伸是
非之公久焉益新蕞爾茲邑公所嘗經民之愛公孔悲
以忱有翦者竹為之發生我來拜公

關

南軒集卷四十二

欽定四庫全書

南軒集卷四十三

宋 張栻 撰

祭文

祭虞雍公

惟公起自遠服進登王朝適逢禦敵之辰曾靡辭難之色攘袂獨奮力折凶渠之鋒驅車四馳徧當邊圉之寄式符眷意遂正鈞衡堂堂漢相之容赫赫周民之望方三年之坐閱指萬里以言歸顧寵光之至隆在近世而

莫比豈期疾遽遽以訃聞帝所咨嗟士增歎息某之愚
戇嘗勤推轂之懷論有與同正惟公議之報輒遣薄奠
用將鄙誠公之英靈實所臨鑒

祭汪端明

嗚呼公之盛名蓋四十年有如黃鍾大呂歸然在懸使
未攷擊人之望之亦知其為衆樂之先惟平日之所履
每務倣乎昔賢不與世以交驚不絕俗而孤騫獨好義
以款款而懷忠之拳拳苟片善之足取必挽後而推前

或所趣之有違敢妄假於色言顧規摹之若是豈斯世
之其然昔棲遲於下僚窮師友之淵源逮顯用於王朝
論據經而不偏實衆芳之所宗蔚佩蘭而握筌屢賦政
於藩方亦惠澤之究宣晚卧柯山靜觀其旋玩心於羲
經不自放而益虔隱聲實之逾隆竚側席之招延何大
命之止斯歎莫返於逝川痛易簣於蕭寺無居宅之一
椽嗚呼前輩風流于今邈焉典刑云亡後生孰傳念言
愚蹤公所知憐義篤金石久而彌堅書猶在手人隔九

泉屬拘印紱奔走莫緣孰知予悲涕泗而漣

祭劉樞密共甫

謹為位致祭于故留守觀文樞密劉公之靈惟公德業
孚于上下威望著于華夷秉國鈞以輔明主天不憖
遺人之云亡夙蒙公知尤重傷痛為位家塾慟哭寫哀

再祭

嗚呼哀哉六月甲子喪我元臣如其可贖何直百身蓋
積天下之望已久而閱天下之故已深其明決足以斷

謀於俄頃而剛毅足以任重於千鈞忠誠孚于君心惠澤浹于斯民威名懾乎姦宄義槩動乎三軍使之主廟堂之上固足以厭患於未形而置之排難解紛之際不俟施為已足以折衝於精神國虧柱石人失典刑此有識之士所以為天下惜而至於泣涕沾巾者也嗚呼哀哉忠顯之烈感乎幽明二卿之忠不忘請纓公自壯歲念其家聲敵騎飲江扈從時巡國有大政抗論前陳由斯而來蔚其直稱出身而刑國有大人及其分閭潢池

息兵遂登紫樞以翼政經收綱端本用尊朝廷凜然正
色公言是伸復牧于藩所至續聞揀荒之政近世莫倫
旋觀設施靡靡左右具宜久而愈新江湖轍環幾
老于行入望公歸帝圖厥勤豈不用公未極于成嗚呼
哀哉夫子知我匪契之云我之於公惟義是親相勉相
厲期報吾君情深意得有同弟兄言念作別乙未之春
我車入南公往江濱眷焉不舍語何諄諄豈期一闊而
隔死生精爽在目我言孰聽嗚呼哀哉義當奔走送公

歸輅屬其拘攣王事有程哭公家塾載遣此文禮雖不
豐公鑒其誠

三祭

嗚呼哀哉公之云亡既踰再時匪今之悲百年之思故
歲之冬始奉遺墨一見流淚繼之以哭墨淡行斜如公
疲繭誦公之言則何昭晰始云國恥抱恨九原勉予忠
義以報吾君中言先公銘志未立豈無他人命予以筆
永復繼書囑弟及子嗟予何人乃託以死精爽在上耳

聞公言顧雖不武敢怠勉旃銘詩脫草遽遣薦陳獨慙
荒蕪曷詔不泯貽書平甫期守公訓告于二子罔墜厥
命惟元晦君實公所敬無求于外惟晦是聽公之息女
當擇于歸顧予雖遠願與聞之凡公所命當以復公薄
莫是將告于公宮

祭唐待制

立夫

惟公清夷粹溫抗志千古文辭深嚴穆我王度獻納雍
容有感無忤遇民如兒伊教匪怒及臨事會不改平素

人方忽忽已獨有裕嗚呼惟公之賢世或知之而鮮克
窺其微蓋據梧隱几獨得忘言之妙故飢食渴飲俱不
外乎天機沒無怛化則亦其宜先君與公道義之交豈
獨賓客之敬藐然孤生早辱過聽推其所懷於公莫隱
方抱鉅痛公復云亡東望鄱水有涕淋浪免喪之初念
篤先友敢遣蕪祠侑此卮酒

祭王詹事

惟公天與勁特世推忠純正色立朝姦邪所憚其於當

今大義冑中見之甚明非苟然假竊者比也盖自發策
大廷至於沒齒凡十五年凜如一日去年之春復來造
朝身雖已病愛君采篤惟昔先人雅器重公藐然孤生
晚蒙公知去違朝路曾未幾日遽聞來訃越在道塗
今定止始克遣一觴之奠盖惟茲世痛公之亡而非獨
下交之私情也

祭張舍人

安國

某率某官某就城北祓禊亭為位致祭于亡友舍人張

公之靈嗚呼去年此時送公湘濱豈期今茲哭公失聲
英爽在目交情不忘邈不復見我涕以滂惟公天姿邁
偉發越而不壽考以昌王國今茲之哭豈吾黨私醴肴
匪多公其臨之

再祭

嗟乎如君而止斯耶其英邁豪特之氣其復可得耶其
如長江巨河奔逸洶湧渺然無際而獨不見其東匯溟
渤之時邪又如驂騑綠耳追風絕塵一日千里而獨不

見其日暮稅駕之所耶此某所以痛之深惜之至而哭之悲也惟君起布衣被簡遇十年之間入司帝命出領數路文章之煒煌政事之超卓多士之所共知亦不待某之贊歎惟其孝友恂恂朝夕則人有不得而盡知者方自荊州歸某以書抵君謂及此閒暇專意承志實進德脩業之要君深以為然孰謂曾未數月乃有此聞某傾蓋荷知久而采篤言有勁切君不以為迂此意何可忘也道阻且長不得往哭遣致一奠孰知予悲

祭姚端明

惟公早試劇煩見才猷之敏劭晚登廊廟都寵數之便
蕃方新十國之瞻遽作九原之隔凡茲民吏孰不傷嗟
某昔歲朝班嘗奉笑言之款如今官守幸遵規畫之餘
念託契於交承敢異情於生死遠將一奠少見鄙誠

祭王侍郎

嘉叟

惟靈強毅自立克大其門進登王朝無所附麗從容造
膝有見不隱帝稱其直士歎其忠豈期卧家遽以訃告

凡百君子孰不嗟痛矧惟交舊嘗辱論心為國惜賢揮
淚無已道阻且遠莫獲走前一奠不腆少致此誠嗚呼
哀哉

祭黃侍郎仲秉

嗚乎孰謂仲秉而止於斯耶念言鄉曲之契萬里相遇
意好特深迨茲朝著志同有幾握手憂國言靡及私僕
之去國君則愴然謂子之行予胡可又本期有補寧為
潔身嗟乎斯言琅琅猶昨日事耳去年君歸道荆鄂間

數寄手書眷焉不舍豈期抵舍遽以訃傳始聞其疑已
乃深痛善類之喪士所共嗟矧惟下交情其能已嗟乎
仲秉溫厚而文立朝有忠益之譽為政有平理之稱遠
業未久中道遽止嗟乎痛哉敬遣薄奠遠致鄙誠執事
占辭墮淚盈紙

祭查少卿

嗟嗟元章而止斯邪修短有命亦奚以悲惟其所有未
克究施昔之觀人驗于其私君之在家孝友融怡出而

臨民則具是依人之有才患不克勝惟君敏才遇事風
生而能自持以蹈準繩博見洽聞貫穿古今發於文辭
溫潤老成尤長論事纚纚可聽蚤登道山嘉言有稱持
節蜀道撫循春溫中外踐更名實攸敦前年之秋萬里
來歸往臨秦淮軍民具宜人曰賢勞君靡難辭云何一
疾遂以訃家逮茲踰年竟老煙霞訃音初傳駭愕嘆呀
念昔幕府傾蓋情親竭來同朝友誼深憂時許國則
識君心解后歸舟班荆共語覺君病餘未渠復故恠君

臨別感慨如許嗟嗟元章有志未遂尚約卜廬湘水之
溪豈期一別而乃永已君弟在荆銜血星奔君孤藐然
孰誨孰存哭遣此奠君乎不聞

祭呂郎中

嗚呼前年之春識公嚴陵望其容藹然有慈祥豈弟之
氣知其臨民之不苛也聽其言纚然多故家遺俗之事
又知其世守之不忘也別後之書情何篤也訃音之傳
痛何遽也況於令子友義為深一奠之禮敢以薄而廢

耶

祭費檢正

惟公植德敦靜蓋徐公之有常秉心曠夷實師德之無
競奉職外服去愈見思列官王朝久不改度方矚持符
之拜遽遭偃月之疑猶冀護藩豈期易簣某夙蒙睠予
託在葭莩祇增百感之深莫前一酌之慟禮雖不腆情
則可知

南軒集卷四十三

欽定四庫全書

南軒集卷四十四

宋 張栻 撰

祭文

祭萬二提刑兄

惟兄植德忠厚持身謹嚴早策名於雋科遂蜚英於賢
軌對揚天陞蓋嘗膺綸綍之褒周旋坤維所至有袴襦
之詠爰因郡最益究外庸漢水詳刑茂著平反之實變
門易節有增刺舉之光方聞趨召之恭忽駭抱病之報

竟茲奄忽實重痛傷載惟門戶之衰正竊棣常之庇永
言流涕莫喻此情恨以阻修無因奔走一奠不腆鄙誠
是將

祭黃運使

清臣

惟靈敦厚為質而德慈祥惟其所歷阻難備嘗故於民
情尤所究詳景倩真清徐公有常將命嶺海以身律荒
移節來湘風采載揚于彼原隰馳驅靡遑謂當終更歸
近帝旁如何一朝而奄云亡賓席方設語音琅琅得疾

俄頃見聞駭傷下逮閭里攀嗟徬徨某之所居實邇門
牆奔走弗及執手涕浪念言傾蓋意味則長與人之周
是固難忘疇昔勝日從容豆觴豈期於今來哭公堂一
奠不腆中誠是將

祭趙養民運使

惟靈寶源積慶列鼎傳家宣化承流飛聲籍甚盤根錯
節游刃恢然爰入對於昕朝遂結知於宸扆出綸示寵
持節分華民瘼旁咨豈憚驅馳之遠邦財益阜生取歛

散之權何一疾而弗廖不終更而歸報王畿結綬未酬
葵向之塵夜壑移舟迺起薤晞之歎某雅承契好茲共
官聯笑語如存忽驚於永已酒有不腆少寄於餘哀

祭蕭殿撰

惟公氣和而節剛言訥而行敏視之退然初若不能及
其當可言之地論議切直風采凜凜中外聳然豈非庶
幾乎仁者之勇耶某頃在朝列每見公憂時惻惻備形
辭色心竊期之已而平日之言率皆可復益知其所守

有素非苟然者來使湘州某適在遠方嗟再見之難豈
謂九原之隔書猶在手訃忽來傳為時惜賢臨風隕涕
一奠遣致少述鄙誠

祭宇文使君三十一舅

惟靈席慶鼎鍾之門留心韋布之事跡其壯歲蔚然懿
文況德履之素寬復天下之有裕宜昌遠業克繼先猷
方小試於偏州固已稱於惠政未結王畿之綬忽移夜
壑之舟宣室受釐不復賈生之召桐鄉奉祀空畱朱邑

之名某適守遐方遽承來訃載誦渭陽之什涕隕盈襟
緬想佳城之旣心馳執紼

祭魏元履

嗟乎仕于王朝自一命而上皆得一論䟽時事此古之
義而亦祖宗詔也君起布衣服在學省忠言屢發率關
大體在他人方且蹙縮畏避君輒先之亦可謂毅然有
立矣世之議者羣起而求多於君此蓋無足恠然君自
退歸以來益務自脩以書抵予謂將講學進所不逮予

得之而嘆息以為君異日之所成就其又非予所可量者而孰謂天不復假之年耶君雖未遂傾盖之願而君相與之意則甚厚豈謂竟不克識君耶一奠往致以紓予情

祭儲經屬

惟靈早以藝文有聲場屋晚游幕府簡默自將故鄉渺然羈懷莫寄因循一疾遂至沈綿獨資同僚共舉終事嗚呼可哀也夫

祭秦致政

某來桂林首訪鄉之老成而將問政焉人士同辭以公
為稱首公雖已枕疾于家罕接人事然如珠玉之在山
淵游于其間者亦足以借其輝潤惟公起自茲土取科
第歷事以忠厚廉直稱亦嘗典州有澤于民已乃謝事
於未衰優游鄉閭子孫滿前安恬獲福克享上壽在公
庶幾乎無所恨矣然公之云亡後生失儀刑之尊吾黨
乏咨詢之益是用嘆傷為之流涕不腆一奠聊寫此誠

祭甄總管

惟靈早以忠義赴乎功名方排難解紛之時有投機應
變之智慷慨辭氣感動三軍謂當究於設施乃繼遭於
排抑逮于晚歲再逢當宁之知旋即九原莫展據鞍之
願考先世平江之牘想一時共濟之人念事會之多違
歎奇才之難得屬茲假守適值喪舟薄奠薦誠臨風增
愴

祭賈仲山知縣

惟我別墅與君隣牆春朝夕幅巾徜徉湘西之別我
獨憂君爾然其漉願言愛身甫茲半載遽以訃傳推案
愕眙繼以泣然惟君之才疏通而敏惟君之行友睦以
謹曾未究施而止斯耶道阻且長予之悲耶

祭邢致政

嗚呼魯仲生而多艱暫仕輒歸已乃掛冠其才有餘蓋
可撥煩曾不少試老于家山閒止名堂惟適之安牕戶
明潔日對孱顏坐上客滿不空杯棹且復重義周人急

難謂享壽康而年亦慳我家長沙殆若鄉關故舊益落
為之涕潛昔來茲堂舉酒相看今來茲堂帷白旒丹鳴
呼哀哉

祭經幹八兄

嗟哉吾兄生也多屯惟生之艱宜永厥齡胡亦嗇之而
止於斯命也不齊其孰為之乙酉之夏過我湘濱撫我
苦幽話言諄諄為我久畱去則不忍舟中之別有淚如
墮我觀吾兄齒髮未衰願言愛身相逢有時兄復一笑

子言甚真我健且武當復南征側聞還家有以自娛醜
酒擊鮮賓筵則都謂當婆婆樂此晚歲豈期訃來駭痛
曷已邈在萬里走哭無從寄此一觴酬西南風

祭宋子飛參議

哀哉子飛而至然耶孰無憂患君何酷耶始聞哭子繼
曰悼亡念君之親白髮在堂曾未幾日亦以訃傳想若
曷任摧荒曷全作書弔君下筆不忍道阻且長畏聞來
信哀哉子飛身竟隨之臨風泣然為君涕洟如君吉德

所遭乃爾惟命不齊孰主張是連陽識君今兩周星離
合不常交情愈親湘岸之別自夏徂秋詩墨未乾君已
不畱有繫者殯誰其收之婉孌兩孫誰其周之里有賢
公隣有君子話言平生當亦任此我獨在遠莫克奔馳
一奠往致哀哉子飛

祭南康四九兄

嗚呼同祖兄弟今存四人惟兄能文自于妙齡意其遠
大以翼吾門僅守一州才未克伸豈謂茲朝乃傳訃音

驚惶慟哭痛心原鵠為位一奠哀哉此情

同前

嗚呼哀哉惟兄早歲秀發而文秦國之恩篤於諸孫忠
獻之愛視子攸均矧惟伯父寔艱寔勤未究之業付之
吾兄謂當遠大以翼以承如何中道車折其輪僅歷一
州莫覩厥成嗚呼哀哉某之於兄少長相親論文講藝
豈無友生雪川之別慘焉酸辛視兄之容澁而不榮酒
酣諄複願言愛身少屏剛劑以致和平孰期一疾竟以

此傾嗚呼哀哉于今幾年遠寓雲濱鴻雁莫聯每傷予
心矧茲永訣痛復可任念當挈歸以近榆枌乃聞知命
留葬是云嗚呼哀哉遺字見屬奉之涕零將絕泚筆又
何剛明嗚呼哀哉屬拘印紱奔走不能向風長號薄奠
是陳猶子幼弱念言惇惇敢不扶持兄言是遵尚惟英
爽其或來歆

祭胡廣仲主簿

惟君孝友之德篤乎天性問學之志自乎初年疾惡見

其公心臨事知其審慮謂當遠大以究所成如何一朝遽止於此聞訃之始痛恨則多豈惟歎德門失承家之賢抑亦吾黨失同志之助交遊歲夕重以婚姻往哭未能薄禮先致涕零橫臆言不復文

祭吳晦叔

嗚呼惟君早登五峯之門即捐進取之習從事義理今幾二十年思慮益親操履益固而其曉悉人情通練世事持之以忠信行之以周密蓋有用之實才而進學之

良資也豈謂一旦止於斯耶某與君論心為日亦久切
磋講究友誼金石訃音來傳泣下莫止嗟夫任道之艱
而同志益落此予之所悲而且憂也官守所拘未能往
哭一奠遣致言不復文

祭外姑何恭人


惟靈生于相家來嬪德門奉饋采藻克謹晨昏如賓之
敬婦道則宜逮夫晚歲有光母儀允矣三德協于彤史
胡不百年永庇孫子憶在桑兆獲拜于堂辰幾一周有

淚淋浪我悲終天靡怙靡恃起尋渭陽痛復抵此傷哉
道遠一慟莫前薄禮將誠靈其鑒旃

省墓祭文

某往者惟念古不墓祭之義每來展省號哭于前不敢
用世俗之禮以行其所不安而其中心終有所未滿者
近讀周官有祭於墓為尸之文乃始悚然深惟先王之
意存世俗之禮所以緣人情之不忍而使之立尸以享
所以明鬼神之義蓋其處之者精矣今茲用是敬體此

意為位于亭具酒肴之薦以寫其追慕之誠惟事之始
不敢不告俯伏流涕不知所云惟考妣之神實鑒臨之



南軒集卷四十四 終